



Senin, 28 Juni 2021

Ogen: Johanes 10:4-5



Ngikutken Sora Tuhan



Sora, salah sada 'ciri khas' i bas kerina si lit i doni enda. Rubia-rubia jelas kal sorana, emaka megati ka nge si jadikan jadi teka teki. Manusia pe, megati sorana e jadi ciri khas, umpamana penyanyi. Banci si bayangkan uga ergana sorana, si mereken melala ulih man penyanyi e. Gelah sorana e tetap mejile ras rende alu mehuli, si penyanyi tetap latihan olah vocal, perawaten suara ras sidebanna e maka ia jadi penyanyi si handal. Terdauhen, la siarap ciri khas sora sekalak jelma banci nandai ia. Lit si pernah ngerana nina, kubegi ndai sorandu, minter si anu ateku, nina nuri-nuri. Ngkai maka itandaina? erkiteken erteman ia, biasa enggo ibegina sorana. Bagenda me renungenta paksa enda kerna permakan ras biri-birina. Ituriken kerna permakan sibengket ku karang biri-biri arah pintun, kenca itagangi pintun e maka ia bengket. Labo bagi pinangko, si bengket la arah pintun. Hubungan permakan ras biri-biri seh kal paguhna, permakan ras biri-biri tentuna jumpa tep-tep wari, ipastikan permakan maka biri-biri e la kelihen, aman seh maka senang akapna nggeluh. Janah biri-biri pasti nandai permakanna, si tep-tep wari mabai ia dengen alu sorana nehken perentahna. Pasti itandaina sorana, sora si teptep wari ibegina. Perumpaman enda, eme Jesus selaku permakan dengen manusia biri-birina. Kita me ajar-ajar siipermakaniNa, si itemani, ijagai dengen ipastikanNa ngenanami kerina si mehuli. Perenungen man banta, si gejakken nge sora Dibata tep-tep paksa erlebuh man banta? Megati lanai sitandai, sora Dibata ntah sora doni enda si erlebuh. Ntah megati sibegi pe, tempa la sibegi, si pekopal cupingta. Lanai kita jadi anak-anak simetinggel nandangi sora. Mari, desken biri-biri sinandai sora permakanna, kita pe sitandai, sibegiken dengen si ikutkenlah kai nina permakanta.

☞ Ku begi sorandu erlebuh man bangku